



Broj/Број: 03/1-50-1-9-11b/07
Sarajevo/Сарајево: 11.11.2007. godine

Članovima Zajedničke komisije za odbranu i sigurnost BiH

PREDMET: Informacija o posjeti delegacije Potkomisije za sigurnost i odbranu Evropskog parlamenta

Veza, akt broj: 03/1,03/11-05-501/07 od 23.10.2007.godine

Predstavnici Zajedničke komisije za odbranu i sigurnost Parlamentarne skupštine Bosne i Hercegovine Branko Zrno, Ivo Miro Jović i Adem Huskić primili su, 9.11.2007., u posjetu delegaciju Potkomisije za sigurnost i odbranu Evropskog parlamenta.

U delegaciji Evropskog parlamenta bili su: Karl von Wogau, predsjedavajući Potkomisije, te Mihael Brejc, Armand Franjulian i Giovanna Bono, članovi Potkomisije za sigurnost i odbranu Evropskog parlamenta.

Branko Zrno je, u ime Zajedničke komisije, pozdravio goste, izražavajući zadovoljstvo njihovom inicijativom za održavanjem ovog sastanka. U svom obraćanju osvrnuo se na sastav Zajedničke komisije za odbranu i sigurnost, te njene nadležnosti i aktivnosti koje je realizirala do sada. Informirao je goste i o ministarstvima, agencijama i institucijama s kojima Komisija partnerski radi, kao i predstavnicima međunarodne zajednice u BiH.

Karl von Wogau istakao je da je nadležnost Potkomisije za sigurnost i odbranu Evropskog parlamenta slična nadležnosti Zajedničke komisije. Naglasio je da je parlamentarna kontrola odbrambenog i sigurnosnog sektora težak zadatak, posebno što je u prošlosti monopol nad vanjskim poslovima i odbranom imala izvršna vlast. Potkomisija se posebno bavi pitanjem sigurnosne i odbrambene politike Evropske unije, počev od 1999. godine. U tom sklopu već je bilo nekoliko uspješnih policijskih i vojnih operacija, a neke su tek pred njima. Ovdje je naročito naveo dvije operacije, i to: vojnu operaciju u Čadu, koja treba početi u novembru ove godine, te operaciju na Kosovu, čiji će karakter biti sigurnosno-policijski. U svom radu daju mišljenje i odlučuju o budžetu, a Evropski parlament prije bilo koje operacije daje svoje mišljenje o njoj. Na osnovu informacija koje primaju s terena, odlaze na mjesta dešavanja i učestvuju direktno u njihovom rješavanju.

Mihael Brejc, član delegacije iz Slovenije, govorio je o mišljenju koje u EU vlada o pitanju sigurnosne situacije u BiH. Strukturu institucija u BiH nazvao je izrazito složenom, skupom i nedemokratskom. Ona je bila rješenje za završetak rata 1995. godine, ali je sada došlo vrijeme da se reformira ustavno uređenje. On je napomenuo da će Slovenija od 1.1. 2008. predsjedavati Evropskom unijom i za to vrijeme prioritarno raditi na pitanjima pomoći zemljama Zapadnog Balkana na njihovom putu ka EU. Napomenuo je da se u BiH mora izvršiti jači pritisak na političku

strukturu vlasti kako bi ispunila 33 poglavlja iz *Acquis Communautaire*. Pitanje postizanja sporazuma je teško, ali je izrazio očekivanje da će BiH učiniti korak naprijed, bez kojeg Evropa ne može uraditi ništa. Članove Zajedničke komisije za odbranu i sigurnost zamolio je da mu pobliže objasne situaciju u BiH i iznesu svoja očekivanja od Evropskog parlamenta.

Govoreći o pitanju sigurnosti, **Branko Zrno** ocijenio ga je vrlo složenim. Ipak, on je generalno sigurnosnu situaciju u BiH ocijenio dobom, te rekao da ne postoji nijedan pokazatelj koji upućuje na njeno pogoršanje. Nezadovoljstvo Evropske unije sa sigurnosnim stanjem u BiH je politički pojačano neuspjehom policijske reforme i nepotpisivanjem Sporazuma o stabilizaciji i pridruživanju. Naglasio je da su to činjenice i da nije siguran u kakvom bismo svjetlu mogli govoriti o sigurnosnoj situaciji u BiH ako se stanje u kojem se trenutno nalazimo i dalje nastavi.

Nadalje je potvrdio da, iako je politički stav svih činilaca u zemlji da se BiH ne smije dovoditi u vezu sa situacijom na Kosovu, jer Kosovo nije problem Bosne i Hercegovine, ova veza danas ipak postoji i rješavanje ovog pitanja utiče na sadašnju situaciju u BiH.

Adem Huskić izrazio je nadu da gospodin Brejc, kao Slovenac, može bolje razumjeti stanje u BiH, koje je, kako je ocijenio, jako vezano za stanje u regionu. Nedavno potpisivanje SSP-a sa Srbijom negativno se odrazilo u BiH, jer se bh.građani smatraju prevarenim, naročito zato što je u susjednoj Srbiji najjača politička stranka protiv njenog priključenja EU i NATO-u. On je istakao svoje čuđenje zbog čega našu zemlju Evropa drži i dalje po strani, s obzirom da se 70 % građana BiH jasno opredijelilo za njen put ka EU. Dotakao se i pitanja otežanog viznog režima EU s kojim se građani BiH susreću, te propalog paketa ustavnih promjena iz aprila prošle godine.

On je zaključio da je BiH na svaki način zaslužila da bude primljena u EU porodicu.

Ivo Miro Jović također je zaželio gostima dobrodošlicu u Parlamentarnu skupštinu BiH. Istakao je da su se članovi Potkomisije Evropskog parlamenta dobro fokusirali na ono što su zaista posljedice ovakvog prijema BiH kod evropskih institucija. Uzrok svih tih problema leži u Dejtonskom mirovnom sporazumu koji je stvorio nefunkcionalnu državu, te je osnovno pitanje donošenje novog ustava. On je pojasnio da je vrhovni tumač Aneksa 4. ovog sporazuma visoki predstavnik, te rekao da je sistem "dva entiteta-tri naroda" situacija s kojom se BiH ne može uklopiti u sistem EU. Osvrnuo se i na pitanje ustavnih promjena u kojima je učestvovao kao član Predsjedništva BiH.

Branko Zrno je u završnom obraćanju istakao da se svi procesi u BiH moraju odvijati prvenstveno u Parlamentarnoj skupštini BiH, koja treba da raspravlja o svim pitanjima koja su vezana za ustavno uređenje BiH. Lideri političkih stranaka težinu svoje liderske pozicije moraju potvrditi pred Parlamentom BiH i tek tada će se sve odluke smatrati demokratskim.

Nakon razmjene mišljenja, još jednom se zahvalio gostima za održavanje ovog sastanka.

Predsjedavajući
Zajedničke komisije
Branko Zrno